

Во Вторник 6-й седмицы по Пасхе

В понедельник вечера

На Господи возвах: поставим стихов 6, и поем стихиры праздника 3: и минеи 3.

Стихиры праздника, глас 5-й:

Подобен: Радуйся постников:

Усты и душею и умом, от персти Зиждительски и плуновения, очес зеницы Давшаго, и общее просвещение, иже прежде слепый исповедаше, тварем всемирнаго Смотрителя и Строителя, за милосердие токмо создания вочеловечившагося, и проповедаше яко Бога Всесильнаго. Егоже книжницы завистию, и еже к ним беседование, отнюд не могуще зрети, слепотствующе множае, изгнана от соборища судят, иногда зеницы Давшаго слепому душевныя и телесныя.

Победу добльствия слепый на видящих до конца взят: ибо Содетеля сего и Создателя всех и слепый сый узре, видевоочевление создавшееся от плуновения, и сим едином познавый Просветившаго, и Сына Божия, и Владыку всемирнаго: егоже видяще зависти злобою ослепляеми весьма не видеша. И тако сия многосугубо видяще, от сего чудес действия преславная едиными глаголы.

Сомнителен книжником слепым, воочивыйся прежде слепый сый, явися, яко негли никакоже видя: но ложно еже зрети Спаса ради притворяяся, ослеплятися хотящим, помраченными писмене, в нихже сияет сладкое воистинну Солнце, субботодействие обновляяй, соделаый мне, иже сеновное сего светодеяй, и покровение взямай, и свет иже в сих прежде слепым подаде: и ныне зряще, Светоподателя миру проповедует.

Слава, и ныне: глас 8-й:

Правды Солнце мысленное Христе Боже, из утробы света лишенаго, Твоим пречистым прикосновением просветившее обоюду, и наши очи душевныя озарившее, сыны дне покажи, да верою вопием Ти: многое Твое и неизреченное, еже на нас благоутробие, Человеколюбче слава Тебе.

На стиховне стихиры, глас 5-й:

Воскресение даяй роду человеческому, яко овча на заколение ведесе: устрашишася сего князи адстии, и взяшася врата плачевная. Вниде бо Царь славы Христос, глаголя сущым во узах, изыдите: и сущым во тьме, откритесь.

Стих: **К тебе возведох очи мои:**

Господи, и страха Твоего боюся, и лукавое творити не престаю. Кто на судищи судии не боится? Или кто исцелится хотя, врача прогневает, якоже аз: долготерпеливе Господи, на немощь мою умилосердися и помилуй мя.

Стих: Помилуй нас Господи, помилуй нас:

Мученичен: Щитом веры оболкшися, и образом крестным себе укрепивше, к мукам мужески вдашася, и диаволю леть и дерзость упраздниша, святии Твои Господи. Тех мольбами яко Всесильный Бог, миру мир низпосли, и душам нашим велию милость.

Слава, и ныне: глас 8-й:

За милосердие милости воплотивыйся Христе Боже, света лишеннаго от утробы, милосердием неизреченных щедрот, сияния Божественнаго сподобил еси, сего зеницам перстию создательными персты Твоими прикоснувыйся. Сам и ныне Светодателю, и наша озари душевная чувства, яко един Независтнодатель.

По Ныне отпускаеши: и по Отче наш:

Таже отпустительный тропарь, глас 5-й:

Собезначальное Слово Отцу и Духови, от Девы Рождаея на спасение наше, воспоим вернии и поклонимся, яко благоволи плотию взыти на Крест, и смерть претерпети, и воскресити умершья славным Воскресением Твоим.

[Слава: святого, аще имать. И ныне: Богородичен во глас тропаря святого. Аще ли ни: Слава, и ныне, Богородичен, глас 5-й]

Ектенна, и отпуст.

ВО ВТОРНИК, НА УТРЕНИ

На **Бог** Господь, тропарь воскресен, глас 5-й:

Собезначальное Слово Отцу и Духови, от Девы Рождающееся на спасение наше, воспоим вернии и поклонимся, яко благоволи плотию взыти на Крест, и смерть претерпети, и воскресити умершья славным Воскресением Твоим. [Дважды]

[Слава: святого, аще имать. И ныне: Богородичен во глас тропаря святого. Аще ли ни: Слава, и ныне, Богородичен, глас 5-й]

По 1-м стихословии, седален, глас 5:

Подобен: Собезначальное Слово:

Господи, мертв нареклся еси, Умертвивый смерть: во гробе положился еси, Истощивый гробы: горе воини гроб стражаху, доле от века мертвья воскресил еси. Всесильне и Непостижиме Господи слава Тебе.

Стих: Господи, да не яростию Твоею обличиши мене, ниже гневом Твоим накажеша мене.

Судии сядящу, и ангелом предстоящим, трубе гласящей, и пламени горящу, что сотвориши душе моя, ведома на суд? Тогда бо лютая твоя предстанут, и тайная твоя обличатся согрешения. Темже прежде конца возопий к Судии: Боже очисти мя, и спаси мя.

Стих: Дивен Бог во святых Своих, Бог Израилев.

Мученичен: Сияет днесь память страстотерпцев, имать бо от небес озарение: лик ангельский торжествует, и человеческий род спразднует. Темже молятся Господеви, помиловатися душам нашим.

Слава, и ныне: Богородичен:

Мати Божия Пресвятая, Стено христиан, избави люди Твоя обычно, зовущья к Тебе прилежно: сопротив стани врагов, и возвышающихя мыслей, да вопием ти: радуйся Благодатная.

По 2-м стихословии, седален, глас 5.

Подобен: Собезначальное Слово:

Прозревый видится слепый плуновением, человеческое составление прежде Создаваго, не видяй от рождения великое солнце. Темже и благодарение Богу возсылает от души, сего зря образ, по подобию созданный образ Создаваго.

Слава, и ныне: тойже.

Воскресение Христово: псалом 50.

Поем канон праздника, со ирмосы на 8: и минеи на 4. Кондак, и ексапостиларий праздника.

Песнь 1. глас 5-й:

Ирмос: Землю, на нюже не возсия, * ни виде солнце когда, * бездну, юже не виде нагу широта небесная, * Израиль пройде невлажно, * Господи, и ввел еси его в гору святыни Твоя, * хваляща и поюща победную песнь.

Распятие вольное восприим Спасе плотию, источил еси благословение, и жизнь миру Владыко, едине Всеблагословенне, и всех Содетелю. Темже благословим Тя, поем и славим, поюще, воспевающе победную песнь.

В рове Тя преисподнейшем мертва бывша Христе, положи благообразный Иосиф, и привали к дверем гроба камень, Долготерпеливе. Но воскресл еси славне, и мир совозставил еси поющий, воспевающий победную песнь.

Мира что приносите со слезами вы, глаголаше честным женам ангел явлейся? Христос воста: текше рцйте боговидцем учеником, рыдающим и плачущым, яко да възиграют и ликуют светло.

Чудеса преславная сотворяя, Избавитель исцели и слепа от рождения, брением помазав, и рек: иди умыйся в Силоаме, яко да познаеши Мя Бога по земли шествующа, плоть носяща, за милосердие щедрот.

Троицен: Едино Триипостасное Существо почитающе вернии, прославим Отца, и Сына, и Духа праваго, Творца, и Господа, и Избавителя всех, единого несозданного со безплотными зывающе: Свят, Свят, Свят еси Царю.

Богородичен: Во утробу неискусобрачную Твою вселися Чистая Господь, за милосердие щедрот, спасти хотя человека истлевшаго козными вражиими. Того убо моли, град сей спасти от всякаго пленения, и врагов нашествия.

И святого Минея на 4.

Песнь 3.

Ирмос: Движимое сердце мое Господи, * волнами житейскими, * утверди, во пристанище тихое * наставляя яко Бог.

Коллеблющихся сердца утвердил еси, землю всю поколебав Долготерпеливе, честным распятием Твоим еже претерпел еси плотию.

В новем гробе Тебе положи Щедре, Иосиф благообразный, воскресл же еси из мертвых тридневен новосотворивый нас.

Что яко мертва ищите Господа? Воскресе, якоже рече ангел женам вещаше, блистаяся божественным зраком.

Слепа иногда от рождения, приступльша к Тебе исцелил еси Всещедре, славяща смотрение Твое и чудеса.

Троицен: Богу Отцу поклоняемся Пребезначальному, и Сыну, и Божественному Духу, Тринесозданному Естеству, Триипостасному, Единому Богу всех.

Богородичен: Из чрева девическа родила еси Бога воплощенна, Емуже молися Всесвятая Владычице, ущедрити нас.

И святого Минея на 4.
Кондак, Икос, и Седален святого Минея.

Слава, и ныне: Таже седален, глас 8-й:

Подобен: Премудрости:

Всех Владыка и Творец преходя, обрете на пути слепа сидяща, плачуща и глаголюща: не видех в житии солнца сияюща, ниже луны света озаряющаго. Темже вопию Ти: рождейся от Девы, просвещей всяческая, просвети мя яко благоутробен, да зову припадая Тебе Владыко Христе Боже: прегрешений оставление даруй, за множество милости нам Человеколюбче.

Песнь 4.

Ирмос: Услышах Господи слух Твой, * и убояхся, * разумех смотрение Твое, * и прославих Тя, едине Человеколюбче.

Умерша мя древом, пожрен быв Спасе мой, жизнь сый оживил еси, за великую милость: сего ради Слове славлю Тя.

Учеником Господи, соводворяся преславно, сим глаголах еси: идите, проповедите всюду Мое Воскресение.

Уверяя Господи, востание Твое, еже из гроба, любящим Тя Христе, во дни многи соводворился еси, радость творя им.

Воочил еси Господи, слепа из утробы рожденна, рек: иди, умыйся, и прозри, Мое славя Божество.

Троицен: Единочестная, безначальная Троице, нераздельная Существом, раздельна Ипостасьми, спасай вся верно Тя страхом славящия.

Богородичен: Рожество Твое Чистая еже паче естества славословим блажаще верно Тебе Пренепорочная, яко Бога всех Родительницу.

И святого Минея на 4.

Песнь 5.

Ирмос: Окаянную душу мою, * ношеборющуюся со тмою страстей, * предварив ущедри, * и возсияй мысленное солнце, * днесветлыя звезды во мне, * во еже разделить ночь от света.

Вознеслся еси на Древо Щедре, и совознесл еси вся человеки, и борителя змия умертвил еси, и оживил еси создание рук Твоих, яко един Бог всех.

Положился еси во гробе волею Царю Безсмертне, и царствия адова вся истощил еси, мертвыя Воскресением Твоим воздвигнув.

Чудеса велия соделовающаго Слове на земли, людие убиша Тя беззаконнии: но Сам Господи, един всемогущий, якоже предрекл еси, из мертвых воскресл еси Христе.

Очи отверзла невидевшаго свет чувственный, души просветил еси зеницы, и славити сотворил еси сего, познавша Тя Творца, за благоутробие явившася человека.

Троицен: Троицу во Единице, и в Троице Единицу вернии славословим вси, Отца и Сына, и Духа Праваго, единаго Бога, Содетеля всех воистинну.

Богородичен: Како родила еси богоблагодатная Дево Мати Чистая, не познавши искуса мужеска? Како питаеши Питающаго всю тварь? Якоже един весть Сам, всех Творец и Бог.

И святаго Минея на 4.

Песнь 6.

Ирмос: Якоже пророка от зверя избавил еси Господи, * и мене из глубины несодержимых страстей возведи, * молюся, да приложу призрети ми * ко храму святому Твоему.

Распныйся с разбойники Владыко, избавил еси от разбойник лукавых, душегубных страстей, Человеколюбче Господи, вся поющыя Твое распятие, и востание согласно.

Положиша без дыхания Тебе мертва, Христе, во гробе, всем мертвым вдыхающа жизнь: воскресл же еси Господи, вся истощивый Слове гробы, Божественною Твоею силою.

По востании Христе, другом глагола еси: сядите убо во Иерусалиме, дондеже облечетеся силою свыше непобедимою, и известною помощию.

Брение сотвори, очи слепаго от рождения помазал еси, и даровал еси ему прозрети, поюще Твою Слове неизреченную силу, еюже спас еси мир.

Троицен: Триипостасная Единице, Отче нерожденне, Сыне рожденне, и Душе исходне, Трисвятый Господи, едино Существо и сила, спасай вся люди Твоя.

Богородичен: Величия Твоя, Чистая, кто исповесть? Бога бо плотию родила еси преестественно, мир Тобою избавляющаго, Дево Всенепорочная, от всякаго греха.

И святаго Минея на 4.

Кондак, глас 4-й: Подобен: Явился еси днесь:

Душевныма очима ослеплен, к Тебе Христе прихожду, якоже слепый от рождения, покаянием зову Ти: Ты сущих во тме свет пресветлый.

Икос: Струю ми даруй Христе, премудрости неизреченныя, и разума горняго, Свете сущих во тме, и прельщаемых Наставниче, да возмогу чудеса Твоя поведати окаянный, яже Божественная книга научи Евангелиа мира, сиесть, слепаго чудотворение: яко от рождения слеп сый, очи чувственныя приемлет и душевныя, верую взывая: Ты сущих во тме свет пресветлый.

Песнь 7.

Ирмос: Огня гасилище отроков молитва, * орошающая печь проповедница чудесе, * не опаляющи, ниже сожигающи, * песнословцы Бога отец наших.

Воздвижену Тебе на Древо Спасе, погасе солнце, земля волнуяшеса, колебашеса тварь вся, и от гроб мертвии востаяху.

Воставшу ти из мертвых Царю, души совозсташа тамо спящия, славящия силу Твою, еюже смертныя узы разрешишася.

Рано миропомазати Тя женский прииде лик, уведевше же Господи воставша Тя, радовахуса со священными ученики: имиже подаждь нам очищение зол.

Брением помазал еси очи слепаго, и сему повелел еси к Силоаму ити, омывся же прозре, песнословя Тя Христе, Царю всех.

Троицен: Отца безначальна, собезначальна же Сына, и Духа Пресвятаго песнословим: Свят, Свят, Свят еси Боже, Царю всех.

Богородичен: По рождестве Дева явилася еси Чистая, Бога бо родила еси, обновившаго естества Пречистая силою Своею: Егоже моли спастися всем нам.

И святаго Минея на 4.

Песнь 8.

Ирмос: Ангелов сонм, человеков собор, * Царя и Зиждителя всех, * священницы пойте, благословите левити, * людие превозносите во вся веки.

Ангельстии чинове на Кресте Тя видевшие висима Христе Всецарю, и тварь всю изменяюща страхом, ужасошася поюще Твое человеколюбие.

Ад доле Тебе видеви стеньше, и подаваше скоро мертвыя от века тамо хранимыя, Христе, песнословящия Твое человеколюбие.

Сотворя чудеса Христе изрядная, волею воздвижен был еси на Крест, и с мертвыми совокупился еси умертвивый ада, и вся мужеством отрешил еси узники.

Слепаго воочил еси к Тебе приступивша Христе, сему повелевый в Силоамову купель ити, омытися и прозрети, и Бога Тя проповедати, плотию явившагося во спасение мира.

Троицен: Троице нераздельная, Единице неслиянная, Боже всяческих и Зиждителю всех, песнословящия и верно поклоняющияся державе Твоей, от всяких искушений спасай.

Богородичен: Дево Пречистая, богоблагодатная, Твоего моли Сына всегда, да не посрамит мя в день осуждения, но сочтет избранным овцам.

И святаго Минея на 4.

Честнейшую стихословится:

Песнь 9.

Ирмос: Яко сотвори Тебе величия Сильный, * Деву явль Тя чисту по рождестве, * яко рождшую без семене Своего Творца: * тем Тя Богородице величаем.

На Древе крестнем пригвоздился еси Христе Боже, и вся победил еси вражия сопротивная начала, и первую клятву потреби еси Спасе: темже Тя по долгу величаем.

Яко виде Тя Слове, ад доле с душею, воздохну, и вся мертвыя страхом отрещи, познавшыя державу власти Твоя: темже Тя по долгу величаем.

Знамения сотворяюща, и чудеса страшная, собор еврейский зря, завистию уби пленившаго ад Воскресением Своим, и всех яко силен возставающаго.

Востал еси, якоже рекл еси, Животодавче из мертвых, и явился еси святым учеником по востании, знамения сотворивый, и воочивый слепыя: с ними же Тя во веки величаем.

Троицен: Свет Отца чту, Свет славаю и Сына, Свет воспеваю Духа Праваго, един Свет нераздельный, в триех Лицех разумеваемый, Бога Царя всея твари.

Богородичен: Явившися пространнейшая небес Дево Чистая, вместила еси плотию Бога неописаннаго, и родила еси всех Избавление, верою несумненною воспевающих Тя.

И святого Минея на 4.

Екзапостилларий, слепаго:

Умныя мои очи ослепленныя, Господи, от мрачнаго греха, Ты просвети, вложив Щедре смирение, и покаяния омый слезами.

Слава, и ныне: Подобен: Жены услышите:

Мимойдый Спас наш, обрете слепа без очию, плюнув на землю и сотворив брение, помаза его, к Силоаму посла ити и умыться. Он же умывся, прииде видя свет Твой Христе мой.

На хвалитех стихире осмогласника, глас 5-й:

Господи, верей вечныя сокрушивый, и узы растерзавый от гроба воскресл еси, оставль Твоя погребальная, во свидетельство истиннаго тридневнаго Твоего погребения: и предварил еси в Галилеи, в пещере Стрегомый. Велия Твоя милость, Непостижиме Спасе помилуй, и спаси нас. [Дважды].

Множества прегрешений моих презри Господи, от Девы Рождейся, и вся очисти беззакония моя, помысл мне подай обращения, яко един Человеколюбец, молюся, и помилуй мя.

Мученичен: Стратотерпцы Твои Господи, чины ангельския подражавше, яко безплотнии муки претерпеша, единомысленное упование имуще, обещанных благ наслаждение. Тех молитвами Христе Боже наш, мир даруй миру Твоему и душам нашим велию милость.

Слава, и ныне: глас 8-й:

Кто возглаголет силы Твоя Христе? или кто изочтет чудес Твоих множества? Сугуб бо яко виден был еси на земли за благость, сугубы и цельбы недугующим подавал еси: не точию бо телесныя очи отверзл еси, иже от утробы слепому, но и душевныя. Темже Бога Тя исповедаше таящагося, и всем подающа велию милость.

Таже: Слава Тебе показавшему нам свет:

И ектения: Исполним утреннюю молитву нашу:

На стиховне стихиры подобны, глас 5-й:

Подобен: Преподобне отче:

Сияние светоносное просиявшее, зряще проявлено в субботу, светоноснаго слепца, законми Моисеа смущаемии, нравом ослепляющесея зряще сень, осенения не разумеюще покрывающа законы, из негоже не видеша светодетеля, и словом субботы содетеля, воочившаго слепаго измовением, и плуновения новым брентворением. с нимже смешаеми бога того узрим, ослепление фарисейское обличающе зрением, еже от лучшаго.

Стих: Призри на мя, и помилуй мя.

Утро возсия во тме пребывающему нощи невидения, многоболезненному слепому, во струях купели Силоамстей измовенному, свет очесем божественным повелением. Темже светоносный новейший видится, мрак тмы ноцетворных законных изъобличая книжников, и помраченное сих невидение возсияньми просвещаяй светоносными: из нихже ослепление сеновных прежде писмен воочается, от Слова нам подаемыми светлыми сияньми.

Стих: Стопы моя направи по словеси Твоему.

На высоту взыде светоноснаго восхождения, светом богоразумия просвещся слепый, терпя телесное и умное омрачение, еже от Слова новыми светолитии просвещся весь, аще и первее ослепися во обоих и Светодавца познавает, и Светодетеля возсиявшаго из гроба тридневно, и землю уяснившаго Своим воскресением: из негоже возсия свет возсоздания во тме держимым человеком, за благоутробие и велию милость.

Слава, и ныне: глас 8-й:

Правды Солнце мысленное Христе Боже, из утробы света лишенаго, Твоим пречистым прикосновением просветившее обоюду, и наши очи душевныя озарившее, сыны дне покажи, да верою вопием Ти многое Твое и неизреченное, еже на нас благоутробие, Человеколюбче, слава Тебе.

Таже, Благо есть исповедатися Господеви

Трисвятое. И по Отче наш:

Тропарь воскресен, глас 5-й:

Собезначальное Слово Отцу и Духови, от Девы Рождашееся на спасение наше, воспоим вернии и поклонимся, яко благоволи плотию взыти на Крест, и смерть претерпети, и воскресити умершья славным Воскресением Твоим.

[Слава, и ныне, Богородичен, глас 5-й]

Таже ектенія: Помилуй нас Боже: Час 1. И отпуст.

НА ЛИТУРГИИ

Блаженна, от канона слепаго, песнь 4, на 6.

Умерша мя древом, пожрен быв Спасе мой, жизнь сый оживил еси, за великую милость: сего ради Слове славлю Тя.

Учеником Господи, соводворяся преславно, сим глаголаал еси: идите, проповедите всюду Мое Воскресение.

Уверяя Господи, востание Твое, еже из гроба, любящим Тя Христе, во дни многи соводворился еси, радость творя им.

Воочил еси Господи, слепа из утробы рожденна, рек: иди, умыйся, и прозри, Мое славя Божество.

Троицен: Единочестная, безначальная Троице, нераздельная Существом, раздельна Ипостасьми, спасай вся верно Тя страхом славящия.

Богородичен: Рождество Твое Чистая еже паче естества славословим блажаще верно Тебе Пренепорочная, яко Бога всех Родительницу.

По входе тропарь воскресен. глас 5-й:

Собезначальное Слово Отцу и Духови, от Девы Рождашееся на спасение наше, воспоим вернии и поклонимся, яко благоволи плотию взыти на Крест, и смерть претерпети, и воскресити умершья славным Воскресением Твоим.

И храма святаго: И тропарь святаго, аще есть. Аще ли будет и другаго святаго тропарь, то рцы его: таже кондак храма. Слава: святаго. Аще ли будет и другаго святаго кондак, такожде рцы его.

И ныне: Кондак слепаго, глас 4-й:

Душевными очима ослеплен, к Тебе Христе прихожду, якоже слепый от рождения, покаянием зову Ти: Ты суших во тме свет пресветлый.

Прокимен, глас 8-й: Помолитесь и воздадите Господеви Богу нашему.

Стих: Ведом во Иудеи Бог, во Израили велие имя Его.

Апостол в Деяниях, зачало 40. [Дея. 17:19 – 28]

Во дни оны, поемше же Павелъ, ведоша на ареопагъ, глаголюще: можемъ ли разумѣти, что новое сіе глаголемое тобою учение? странна бо нѣкая влагаеши во ушеса наша: хоцемъ убо разумѣти, что хотятъ сія быти? Аѳинее же вси и приходящии страннии ни во чтоже ино упражняхуся, развѣ глаголати что или слышати новое. Ставъ же Павелъ посредѣ ареопага, рече: мужіе Аѳинейстїи, по всему зрю вы аки благочестивыя: проходя бо и соглядая чествованія ваша, обрѣтохъ и капище, на немже бѣ написано: невѣдомому Богу. Егоже убо не вѣдуще [благолѣпнѣ] чтете, Сего азъ проповѣдую вамъ. Богъ

сотворивый мѣръ и вся, яже въ немъ, Сей небесе и земли Господь сый, не въ рукотворенныхъ храмѣхъ живетъ, ни от рукъ человѣческихъ угожденія пріемлетъ, требуя что, Самъ дая всѣмъ животь и дыханіе и вся: сотворилъ же есть от единыя крове весь языкъ человѣчъ, жити по всему лицу земному, уставивъ предучиненая времена и предѣлы селенія ихъ, възсати Господа, да поне осяжутъ Его и обрящутъ, яко не далече от единого коегождо насъ суща: о Немъ бо живемъ и движемся и есмы.

Аллилуиа, глас 8-й: Призри на мя, и помилуй мя.

Стих: Стопы моя направи по словеси Твоему.

Евангелие Иоанна, зачало 42. [Ин. 12:19 - 36.]

Во время оно, Фарисее рѣша къ себѣ: видите, яко никаже польза есть? Се мѣръ по Немъ идетъ. Бяху же нѣцыи Еллини от пришедшихъ, да поклонятся въ праздникъ: сїи убо приступиша къ Филиппу, иже бѣ от Вѣсаиды Галилейскія, и моляху его, глаголюще: господи, хотимъ Иисуса видѣти. Приде Филиппъ и глагола Андреови: и паки Андрей и Филиппъ глаголаста Иисусови. Иисусъ же отвѣща има, глаголя: приде часъ, да прославится Сынъ Человѣчскій: аминь, аминь глаголю вамъ: аще зерно пшенично падъ на земли не умретъ, то едино пребываетъ: аще же умретъ, многъ плодъ сотворитъ: любяй душу свою, погубитъ ю: и ненавидяй души своя въ мѣръ семъ, въ животь вѣчный сохранить ю: аще кто Мнѣ служитъ, Мнѣ да послѣдствуетъ: и идѣже есмь Азь, ту и слуга Мой будетъ: и аще кто Мнѣ служитъ, почтитъ его Отець Мой: нынѣ душа Моя возмутися и что реку? Отче, спаси Мя от часа сего: но сего ради придохъ на часъ сей: Отче, прослави имя Твое. Приде же гласъ съ небесе: и прославихъ, и паки прославлю. Народъ же стояй и слышавъ, глаголаху: громъ бысть. Инїи глаголаху: Ангель глагола Ему. Отвѣща Иисусъ и рече: не Мене ради гласъ сей бысть, но народа ради: нынѣ судъ есть мѣру сему: нынѣ князь мѣра сего изгнанъ будетъ вонъ: и аще Азь вознесенъ буду от земли, вся привлеку къ Себѣ. Сїе же глаголаше, назнаменуя, коею смертію хотяше умрети. Отвѣща Ему народъ: мы слышхомъ от закона, яко Христось пребываетъ во вѣки: како Ты глаголеши: вознестися подобаетъ Сыну Человѣческому? Кто есть Сей Сынъ Человѣчскій? Рече же имъ Иисусъ: еще мало время свѣтъ въ васъ есть: ходите, дондеже свѣтъ имате, да тма васъ не иметъ: и ходяй во тмѣ не вѣсть, камо идетъ: дондеже свѣтъ имате, вѣруйте во свѣтъ, да сынове свѣта будете.

Вместо же Достойно, поем:

Ирмос: Ангел вопияше Благодатней: Чистая Дево радуйся, и паки реку, радуйся: Твой Сын воскрес тридневен от гроба, и мертвыя воздвигнувший: людие веселитесь. Светися, светися, новый Иерусалиме: слава бо Господня на тебе возсия, ликуй ныне и веселися, Сионе. Ты же, Чистая, красуйся, Богородице, о востании Рождества Твоего.

Причастен: Тело Христово примите, источника бессмертного вкусите.